

# Dat Wasser vun Kölle

---

A

Als unser Vatter do booven de Welt jemaat,  
do hät hä et schönste Fleckche Ääd he an d'r Rhing jelat  
dann nohm hä die Kölsche an de Hand un sat:  
dat es jetz üch – et jelohte Land.  
He künnt ihr klüngele, bütze, singe un fiere,  
ävver halt`mer all die Sache  
öm Joddeswelle en Ihre,  
un maat och nit nur ei Deil dovun kapott,  
denn ihr wisst, ich sin alles,  
un dann nemm ich et üch widder fott.

Oh, leever Jott, jev uns Wasser,  
denn janZ Kölle hät Doosch,  
oh, leever Jott, jev uns Wasser  
un helf uns en d'r Nut.

Ming Blome lossen alles hänge,  
Wä hilf en d'r Nut?  
D'r Wellensittich es wie jeck am schänge,  
dä Jung hät secher Woot.  
Uns Joldfesch han de Auge deck  
Un sagen keine Ton,  
de Waschmaschin spilt total verröck,  
woröm hät d'r Minsch Calgon?

Ming Filme entwickel`ich ovends em Rhing,  
dat jeit janZ jot, denn do es alles dren.  
Och wemmer av un zo d'r Dönnscheß han,  
mer gläufen wigger dran.

Dat Wasser vun Kölle es jot,  
dat Wasser vun Kölle es jot,  
dat Wasser vun Kölle,  
dat Wasser vun Kölle,  
dat Wasser vun Kölle es jot.

Oh, leever Jott, jev uns Wasser,  
denn janZ Kölle hät Doosch,  
oh, leever Jott, jev uns Wasser  
un helf uns en d'r Nut.

De Nierestein sin schwer am kumme,  
oh Herr, wat deit dat wih,  
och d'r Hoorusfall hät zojenomme,  
do hilf kei Böschte mih.

Alles Wasserrühre sin total verstopp,  
die dröppen vür sich hin.  
Om Kaffee schwemmp `ne fiese Ölfilm drop,  
wie kütt dat Öl do ren?

Uns Feuerwehr, die es bestemmp nit schläch,  
doch wenn se löscht, Jung,  
dann brennt et eets rääch,  
oh, Herr, dun e Wunder, üvverlächt et dir,  
söns stommer morje vür dinger Dür.

Oh, leever Jott, jev uns Wasser,  
denn janZ Kölle hät Doosch,  
oh, leever Jott, jev uns Wasser  
un helf uns en d'r Nut.

Dat Wasser vun Kölle es jot,  
dat Wasser vun Kölle es jot,  
dat Wasser vun Kölle,  
dat Wasser vun Kölle,  
dat Wasser vun Kölle es jot.